

Xroon tsikjin ndo Pablo xruen en ndo ndo Tito

Ndo Pablo nichje e ndo ndo Tito

¹ Jan an, Pablo, nta a xrée ndo Dio ko ndo Jesucristo kuinche ena ndo ixi sintakuan an kain sen kuinche e ndo Dio ko kaxon ixi xrochuxin sen nge e chuntiana ko me e ti chijni nduaxin,

² ko xrochon en sen ti tsechón sen kain nchakon. Ndo Dio, ndo ncheya i, tsindachro ndo nduaxin jaña tson en ti xrako a nunte xasintajni.

³ Ko nchakon tsindachro ndo Dio ixi jaña tson en, je e ndo juinchenoına ndo chijnie ndo ixi ikaxin sen juakoına sen. Ko ndo Dio, ndo nchemé e jéina, kuetuan an ndo ixi sinta a xrée ndo ko tsjako chijnie ndo.

⁴*Kjin an xroon ji i, Tito. Jan an tikuan xranchi chjan na ixi kayuina chuntiana ndo Jesús. Juasie Ndotáina Dio ko ndo Jesucristo, ndo nchemé e jéina, je e ndo sintanchaoan ndo ko tsikonóa a ndo ko xrotjáa ndo juaxruxin.

Ixrą sinche e ndo Tito tjajna Creta

⁵Nchakon kuintu a nunte jii ngusine ndachaon* ndatin in Creta ixi xroketuen é n sen jii nti a xranchi sinche e sen ko xrojuinchejexian ixrą titjáña ko xrondachrua ngisen tsetuan an ngujngu ni ngo jii tjajna xranchi kuetuan an jan an.

1:4 2Co. 8:23; Gá. 2:3; 2Ti. 4:10. * 1:5 *ndachaon* mar

⁶ *Xrokonda ixi ngisen jitaon en ni ngo jian sinche e sen ixi jaña xro an ngisen tsjankata a na sen ijie, ko xrochóna sen naakua janchri e sen, ko chjen en sen xrokonda tsitikaon xjan Ncháina Jesucristo, ko jaña xro an chujni tsjankata a xjan ijie ko jian tsitikaon xjan.

⁷ Jaña sen jitaon en ni ngo, sen me e tikinixin en sen xrondachro sen xranchi tson en xree ndo Dio, xrokonda naa ngisen jian tsake e ixi jaña tsjankata i na sen ijie. Ko sinchejie a sen aséen sen, ko taka i xrochjee sen juaña. Ko xrokuan i sen, ko tseto a sen ngajin chujni ko sincheya i sen ixi jaña xrotsé sen tomi tjúa i.

⁸ Ko jian tsayé e sen xrojan ngisen tsiji ndo a sen; xrokonda sinche e sen ti jian; jian xroxraon sen ko ndako sinche e sen ngajin ngixe i chujni. Ko nchijí aséen sen tsake e sen ngajin ndo Dio ko ixi nchijí aséen sen sinche e sen xree nchee sen.

⁹ Ko kaxon xrokonda tsintue a sen chijni jian kuayé e sen ixi jaña tsjako e sen ikaxin sen kichuu sen chijni jian, ko kaxon jaña sinchenda sen aséen ni ndachro je a nduaxin nge e tjakona.

¹⁰ Ixi jii itsje ni titikaon a, ni me e ste ngakjen en ni judío, ni nichja xranchi naa ni ninta ko ncheye e na ikaxin chujni.

¹¹ Ni me e xrokonda tsije eni ro a na ixi nchetjáñajin na kain sen ste naa nchia ixi je o tjako na nge e nduaxin a ko je a jian, ixi jaña tsjacha na kueya tomi.

¹² Naa xi tjajnee sen, tjajna Creta, tsindachro xa: “Kain chujni tjajna tsango ncheya na ko tsango jie e na ko tsango ine na ko tsango se e na.”

¹³ Ti tsindachro xa nduaxin me e. Méxin, Tito, soji nichje é sen kichuuna ixi jian xrochuntia sen ndo Dio.

¹⁴ Nichje é sen ixi tsien a sen kain nge e teki ni judío, ko tsitikaon a sen nge e tetuan an ni ningakon en chijnie ndo Dio, chjni nduaxin.

¹⁵ Ni jian xraxaon, kain nge e nche e nã tjuá kaxon. Ko ngisen ndako a xraxaon, xro an nge e jian xraxaon nã ko kain nge e xraxaon nã, tjuá i.

¹⁶ Ndachro nã ixi chúxin nã ndo Dio, ko ti nche e nã, me e tjakoxinna ixi je a nduaxin ti nichja nã. Je e nã tsango ña i nã ko titikaon a nã, méxin jua i nche e nã naa nge e jian.

2

Tsjako ndo Tito chjni jian

¹ Kain nge e tsjako xrokonda jian sinchekuen en sen xranchi jitaxin chijnie ndo Dio.

² Nchekuen én sen tachrí ixi xrokuan i sen, jian sinche e sen ko jian xronichja sen ngajin kain chujni. Xroxraxaon sen jian, ko jian xrochuntia sen, ko xrotjue e sen sen kichuu sen ko taka i xrochjée sen juañao.

³ Ko kaxon jaña janachri jian sinche e jan ko xronichja i jan juancheya ko xrokuan i jan. Jian tsjakoxin jan ixi titikaon jan Ncháina,

⁴ ixi jaña tsjako e jan nchrichajan xranchi xrotjue e nchra ndoxi e nchra ko xranchi xrotjue e nchra chjen en nchra,

⁵ ko jian xroxraxaon nchra, ko tjuá aséen nchra tayakon en nchra ndo a nchra ko tsingijna nchra kain chujni, ko tsitikaon nchra ndoxi e nchra ixi

jaña xro an ngijni xronichjangí e chijnie ndo Dio titika onna.

⁶ Kaxon nchexraxaoan sen chajan ixi jian sinche e chán ko jian xroxraxaon chán.

⁷ Ja a jian nche e kain nge e ixi jaña tsjakoxian ngajin kain sen ixi ja a jian. Ko nchakon tsjakoa, chjente a ko tjakoa ti nduaxin.

⁸ Nichja nge e nduaxin ixi xro an chujni tsjankata a na ijie, ko jaña tsosue e ni ningakon en chijni, ko xro an nge e ti ña i xrondachro na kondee jaina.

⁹ Tetuen én ni nche e ixra ixi tsitikaon na nché e na ixi jian sinche e na ti kuetuen en na ko xronichjangí a na,

¹⁰ ko xrotsee a na nge e je a ne e na. Ko jaña kain na tsikon na ixi chijnie ndo Dio tsango chaxro chijni ko tajon ndo juachaxin tsechónni kain nchakon.

¹¹ Ixi ndo Dio juakoina ndo xranchi tjuaina ndo ixi je e ndo sinchemé e ndo jíee kain chujni sínká.

¹² Ti tjuaina ndo Dio nchekuaina ixi tsintu ena kain ti ndako a ko kain nge e ña i xraxaonna. Ko jian tsake ena nunte xasintajni ko ndako xroxraxaonna ko tsitikaonna ndo Dio.

¹³ Kaxon tjakoina ndo xranchi xrochon enna nchakon tsij ndo Dio na ina, ndo Jesucristo, ndo chónnda kain juachaxin ko tajon ndo juachaxin tsechónna kain nchakon.*

¹⁴ *Je e ndo kuen en ndo ixi jaina ixi tjaun ndo tsajon ndo juachaxin tsechónna kain nchakon ixi kuantsje ndo kain ti ndako a chondana, ko

* **2:13 tsechónna kain nchakon** vida eterna **2:14** 1Pe. 2:9.

tjume e tsayé ena ndo xranchi naa chujnie ndo ko juaxruxin sintu una kain nge e tjauⁿ ndo.

¹⁵ Tito, ji i tjako é sen ko nchexraxaoan sen ko tetuen éⁿ sen ixi juachaxien ndo Dio. Tintue a ixi xrojan ngisen xronichjangí a ko tsjanoa sen ixi nge e tjakoa.

3

Nge e sinche e sen titikaon ndo Cristo

¹ Nchexraxaoan sen tsitikaon sen ni tituan an, ko tuinxin sinche e sen kain ixraⁿ jian.

² Ko xronichja i sen ninaa nge e ti ndako a ixi sen kichuu sen, ko taka i tsoñao sen, ko xrotjue e sen sen kichuu sen ixi jaña tsjakoxin sen nge e jian chón^{da} sen ngaya asé^{en} sen, ko jian xronichje e sen kain chujni.

³ Ixi jaina kaxon sa ó juinche ena xranchi ni ninta, ko baktikaon ana ndo Dio. Ndako a juinche ena, bako^{juna} juaxruxin ixi kain nge e ñaⁱ banche ena ko bakochjuyeina, ko baningakoina na, ko jaina kaxon baningakon ena chujni.

⁴ Tjume e ndo Dio, ndo tantsjengíe kain ti ndako a juinche ena, juako^{jina} ndo ixi jian ndo ko tjue e ndo kain chujni.

⁵ Je e ndo juinchemé e ndo ti ndako a kuachondana, je a ixi jaina xrojan nge e jian juinche ena. Na i, ixi je e ndo bikonó^{aina} ndo ko juinchemé e ndo ti ndako a juinche ena ko juinchetjú^á ndo asé^{eina}. Jaña jongí^{exinna} íjngo ixi Espíritue ndo ko jai natjú^á stechónna.

⁶ Ixi ndo Jesucristo, ndo juinchemé e ti ndako a juinche ena, méxin ndo Dio kuajon ndo Espíritue ndo.

⁷ Ko juasie ndo, juinchemé e ndo jéina ko jaña tsayé ena juachaxin tsechónna kain nchakon.

⁸ Nduaxin chijni ji i, ko tja on ixi tsjako a kain ji i ixi kain sen titikaon ndo Dio sinche e sen kain nge e jian. Kain ji i jian ko tingijna kain chujni.

⁹ Ko ndache sen xronichja i sen xrojan chijni ninta, ko tien a chijni teki sen ti juinche e sen tachrí ina, ko tintue a sintaketo xin sen ti ley kuajon ndo Moisés. Ti tjakaxin kichuu sen tjinte a ko xro an juachaxin chónnda.

¹⁰ Siá kondeexin xrojan ngisen tjaun xrojan sen ni ngo tsinkaxinton sen, nichje é sen kondeexin me e naa o yuu vez ixi ndako sinche e sen ko siá tsienxin a sen, ndache sen satsjixin sen ni ngo,

¹¹ ixi ja a ó no a ixi sen jaña nche e ndako a xraxaon sen ko ti nche e sen jaña ícha nchekangi sen ijie chónnda sen.

Nge e kuetuan an ndo Pablo

¹² *Nchakon xroxruan an ndo Artemas ko ndo Tíquico tsiji sen. Chjakon an tuinxin tsji ia tsitsjenana tjajna Nicópolis ixi nti a tsake é tsatsingaja nchakon ikin.

¹³ *Ja a jian tingijna ndo Zenas, ndo abogadoe chujni, ko ndo Apolos, ko chje é sen ti xrokonde e sen nchakon satsji sen ixi xro an nge e tsitjáñe e sen.

¹⁴ Ko sen kichuuna xrokonda tsitja sen sinche e sen nge e jian ko tsingijna sen sen kichuu sen

nchakon tsake e na juachjaon, jaña tsjakoxin sen
ixi tjintee nge e nche e sen.

Juexin nichja ndo Pablo

¹⁵ Kain sen riki an nti i xruan an sen juajna. Ko
ja a tájuan juajna ngajin kain sen chuntia Ncháina
nti a, kain sen tsango tjuajna. Ndo Dio sintan-
chaonnta ndo kainnta. Jaña tson en.

**Chijnie ndo Jesucristo
Popoloca, San Luís Temalacayuca: Chijnie ndo
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files
dated 29 Jan 2022

ee37a138-f1b9-51ef-b60f-e89d6de4d06f